

ЎЗБЕКИСТОН РЕСПУБЛИКАСИ ПРЕЗИДЕНТИНИНГ
ҚАРОРИ

316 **2018 — 2022 йилларда иссиқлик таъминоти тизими-
ни ривожлантириш дастури тўғрисида**

Истеъмолчиларга иссиқлик энергияси етказиб бериш сифатини ошириш ва узлуксизлигини таъминлаш чора-тадбирларини изчил амалга ошириш, замонавий тежамкор ва энергияни иқтисод қиладиган технологияларни жорий этиш асосида иссиқлик таъминоти тизимининг асосий фондларини янгилаш ва модернизациялаш, ёқилғи-энергетика ресурсларидан самарали ва оқилона фойдаланиш мақсадида:

1. Қуйидагилар республикада иссиқлик таъминоти тизимини янада ривожлантиришнинг устувор вазибалари этиб белгилансин:

иссиқлик таъминоти тизимига энергия ва ресурсларни тежайдиган янги

Ўзбекистон Республикаси қонун ҳужжатлари тўплами, 2017 й.

технологиялар ва ускуналарни, шу жумладан, қайта тикланидиган энергия манбаларидан фойдаланган ҳолда жорий этиш;

энергия самарадорлиги юқори бўлган маҳаллий қозонхоналар қуриш, шунингдек, хонадонларга якка тартибда ички иссиқлик таъминоти тизимини ўрнатиш йўли билан кўп хонадонли уй-жой фонди, ижтимоий ва бошқа объектларнинг номарказлаштирилган иссиқлик таъминоти тизимини ривожлантириш;

жисмоний ва маънавий эскирган тежамкор бўлмаган қозонхона агрегатларини алмаштирган ҳолда ишдан чиққан магистрал ва тақсимлаш иссиқлик тармоқларини модернизация ва реконструкция қилиш ишларини амалга ошириш;

энергия ресурслари истеъмол қилиниши ва ишлаб чиқарилишининг меъёр бўйича ҳисобга олинишини ташкил этиш, истеъмолчиларнинг иссиқлик таъминоти хизмати ҳақини ҳисоблаш ва тўлашнинг автоматлаштирилган ҳисобкитоб тизимини жорий этиш;

ноишлаб чиқариш харажатлари ўсишига йўл қўймаслик ва иссиқлик энергиясини етказиб бериш, тақсимлаш ва истеъмол қилишда меъёридан ортиқча нобудгарчиликларни камайтириш ҳисобига сарф-харажатларни қисқартиришга йўналтирилган иссиқлик таъминоти тизимида ягона техник сиёсатни амалга ошириш.

2. 2018 — 2022 йилларда иссиқлик таъминоти тизимини ривожлантириш дастури (кейинги ўринларда — Дастур) тасдиқлансин, у қуйидагиларни ўз ичига олади:

2018 — 2022 йилларда маҳаллий қозонхоналарни модернизациялаш ва реконструкция қилиш параметрлари 1-иловага* мувофиқ;

2018 — 2022 йилларда энергия самарадорлиги юқори бўлган маҳаллий қозонхоналар қуриш, жумладан, гелиоқурилмаларни қўллаш параметрлари 2-иловага* мувофиқ;

2018 — 2022 йилларда марказий қозонхоналарни модернизациялаш ва реконструкция қилиш параметрлари 3-иловага* мувофиқ;

2018 — 2022 йилларда иссиқлик тармоқларини модернизациялаш ва реконструкция қилиш параметрлари 4-иловага* мувофиқ;

2018 — 2022 йилларда хонадонларга якка тартибда ички иссиқлик таъминоти тизимини ўрнатиш параметрлари 5-иловага* мувофиқ;

2018 — 2022 йилларда иссиқлик таъминоти тизимини ривожлантириш комплекс тадбирлари 6-иловага** мувофиқ.

3. Белгилаб қўйилсинки:

Ўзбекистон Республикаси Уй-жой коммунал хизмат кўрсатиш вазирлиги, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари — Дастурнинг самарали ва ўз вақтида амалга оширилиши учун масъул бўлган ижро этувчи органлар ҳисобланади;

Ўзбекистон Республикаси Уй-жой коммунал хизмат кўрсатиш вазирли-

* 1 — 5-илвалар берилмайди.

** 6-илова рус тилидаги матнда берилган.

гининг Кўп хонадонли уйлар ва иссиқлик таъминоти объектлари қуриш бўйича инжиниринг компанияси — Дастур доирасида лойиҳаларни амалга ошириш бўйича буюртмачи ҳисобланади;

«Иссиқликэлектрлойиҳа» акциядорлик жамияти, Ўзбекистон Республикаси Вазирлар Маҳкамаси ҳузуридаги Республика «ЎЗИнжиниринг» лойиҳа институти — Дастур доирасида амалга ошириладиган лойиҳаларнинг лойиҳа-смета ҳужжатларини ишлаб чиқиш бўйича бош лойиҳа ташкилотлари ҳисобланади.

4. Қуйидагилар тасдиқланган Дастурни амалга оширишни молиялаштириш манбалари сифатида:

а) маҳаллий қозонхоналарни модернизациялаш, реконструкция қилиш ва қуриш қисмида:

ижтимоий соҳа объектлари учун — Ўзбекистон Республикаси Давлат бюджети ҳисобига марказлаштирилган инвестиция маблағлари;

кўп хонадонли уйлар учун — хусусий уй-жой мулкдорлари ширкатларининг ўз маблағлари, тижорат банкларининг кредитлари, пудрат ташкилотларининг маблағлари ҳамда Ўзбекистон Республикаси Уй-жой коммунал хизмат кўрсатиш вазирлигининг Уй-жой коммунал хўжалигини ривожлантириш жамғармаси маблағлари;

б) марказий қозонхоналарни ҳамда иссиқлик тармоқларини модернизациялаш ва реконструкция қилиш учун — иссиқлик таъминоти ташкилотларининг ўз маблағлари, Ўзбекистон Республикаси Давлат бюджети ҳисобига марказлаштирилган инвестиция маблағлари, Ўзбекистон Республикаси Уй-жой коммунал хизмат кўрсатиш вазирлигининг Уй-жой коммунал хўжалигини ривожлантириш жамғармаси ҳамда халқаро молия институтларининг маблағлари;

в) хонадонлар ички якка тартибдаги иссиқлик таъминоти тизимини ўрнатиш учун — турар жой ва нотурар жой хоналари мулкдорларининг маблағлари, шунингдек, тижорат банкларининг имтиёзли кредитлари;

г) марказий қозонхоналар ва иссиқлик тармоқларини модернизациялаш ҳамда реконструкция қилиш бўйича дастурларни амалга ошириш доирасида лойиҳаларнинг техник-иқтисодий асослари (техник-иқтисодий ҳисоб-китоблари)ни ТИА (ТИХК) ишлаб чиқиш учун — Қорақалпоғистон Республикасининг республика бюджети ҳамда вилоятлар ва Тошкент шаҳри маҳаллий бюджетларининг маблағлари, шунингдек, Ўзбекистон Республикаси Уй-жой коммунал хизмат кўрсатиш вазирлигининг Уй-жой коммунал хўжалигини ривожлантириш жамғармаси маблағлари;

д) маҳаллий қозонхоналарни модернизациялаш, реконструкция қилиш ва қуриш бўйича лойиҳаларнинг лойиҳа-смета ҳужжатларини ишлаб чиқиш учун — Ўзбекистон Республикаси Уй-жой коммунал хизмат кўрсатиш вазирлигининг Уй-жой коммунал хўжалигини ривожлантириш жамғармаси маблағлари.

5. Ўзбекистон Республикаси Уй-жой коммунал хизмат кўрсатиш вазирлиги Ўзбекистон Республикаси Давлат архитектура ва қурилиш қўмитаси, «Иссиқликэлектрлойиҳа» АЖ, Ўзбекистон Республикаси Вазирлар Маҳка-

маси ҳузуридаги Республика «ЎзИнжиниринг» лойиҳа институти, «Тошуй-жойЛИТИ» АЖ, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари билан биргаликда:

2017 йилнинг 1 сентябрига қадар марказий қозонхоналарни, иссиқлик тармоқларини модернизациялаш ва реконструкция қилиш бўйича лойиҳаларнинг ТИА (ТИХК) ишлаб чиқиши ва ваколатли органларда экспертизадан ўтказилишини ҳамда маҳаллий қозонхоналарни модернизациялаш, реконструкция қилиш ва қуриш бўйича лойиҳа-смета ҳужжатлари ишлаб чиқиши ва ваколатли органларда экспертизадан ўтказилишини таъминласин;

лойиҳаларнинг ТИА (ТИХК) ва лойиҳа-смета ҳужжатлари белгиланган тартибда тасдиқланиши натижалари бўйича Дастур доирасида лойиҳаларнинг амалга оширилиши учун масъул бўлган пудрат ташкилотларини тегишли тажрибага, техник ва молиявий салоҳиятга эга бўлган ташкилотлар орасидан тендер (танлов) асосида аниқлаш, бунда тендер (танлов) ҳужжатларида маҳаллий қозонхоналар қуриш ва кейинчалик уларга таъмирлаш-сервис хизмати кўрсатиш назарда тутилсин.

6. Дастурни амалга ошириш доирасида бир босқичли тартибда лойиҳаларнинг ТИА (ТИХК)ларини тасдиқлаш билан бирга лойиҳа олди ҳужжатларини ишлаб чиқишга рухсат берилсин.

7. Лойиҳада энергия самарадорлиги юқори маҳаллий қозонхоналар ёки хонадонларга яқка тартибда ички иссиқлик таъминоти тизимидан фойдаланиш назарда тутилмаган янги қурилаётган кўп хонадонли уйлар, шунингдек, ташкилотлар ва идораларнинг бинолари бўйича архитектура-режалаштириш топшириқларига розилик бериш қатъиян тақиқлансин.

8. Ўзбекистон Республикаси Давлат архитектура ва қурилиш қўмитаси, «Ўзстандарт» агентлиги Ўзбекистон Республикаси Халқаро қуёш энергияси институти билан биргаликда икки ой муддатда маҳаллий қозонхоналар, хонадонларга яқка тартибда ички иссиқлик таъминоти тизими, қуёш коллекторлари билан бирга лойиҳалаштирилган объектларнинг энергия самарадорлиги бўйича шаҳарсозлик нормалари ва қоидаларини, шунингдек, қуёш коллекторларини тайёрлаш, синаш ва қўллаш бўйича давлат стандартларини ишлаб чиқсин.

9. Ўзбекистон Республикаси Президентининг 2015 йил 5 майдаги «2015 — 2019 йилларда иқтисодиёт тармоқлари ва ижтимоий соҳада энергия сарфи ҳажмини қисқартириш, энергияни тежайдиган технологияларни жорий этиш чора-тадбирлари Дастури тўғрисида»ги ПҚ–2343-сонли қарори билан тузилган Республика энергия самарадорлиги ва қайта тикланувчи энергия манбаларини ривожлантириш комиссияси зиммасига (А.Н. Арипов) қуйидаги вазифалар юклансин:

Дастурни амалга оширишни мувофиқлаштириш ва мониторинг қилиш;

иссиқлик таъминоти тизимида энергия ва ресурсларни тежайдиган янги технологиялар ҳамда ускуналарни жорий этиш бўйича, жумладан, қайта

тикланувчи энергия манбаларидан фойдаланган ҳолда тавсияномалар ишлаб чиқиш;

Ўзбекистон Республикаси Уй-жой коммунал хизмат кўрсатиш вазирлиги, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари раҳбарларининг Дастур амалга оширилиши тўғрисидаги ҳисоботларини ҳар чорақда эшитиб бориш;

Дастур параметрларига асосли ўзгартиш ва аниқликлар киритиш.

10. Ўзбекистон Республикаси Иқтисодиёт вазирлиги ва Молия вазирлиги 2018 йилдан бошлаб ҳар йили Ўзбекистон Республикасининг Инвестиция дастурини шакллантиришда Ўзбекистон Республикаси Уй-жой коммунал хизмат кўрсатиш вазирлиги, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликларининг асосланган ҳисоб-китоблари бўйича Дастурни амалга ошириш учун Ўзбекистон Республикасининг Давлат бюджети ҳисобидан марказлаштирилган капитал маблағлар лимитлари ажратилишини назарда тутсин.

11. Ўзбекистон Республикаси Иқтисодиёт вазирлиги манфаатдор вазирлик ва идоралар билан биргаликда саноат кооперацияси асосида тайёр маҳсулот, бутловчи буюмлар ва материаллар ишлаб чиқаришни маҳаллийлаштириш Дастурини ишлаб чиқишда 2018 йилнинг 1 январидан бошлаб, Ўзбекистон Республикаси ҳудудида энергия самарадорлиги юқори маҳаллий қозонхоналар, хонадонларга яқка тартибда ички иссиқлик таъминоти тизимлари ишлаб чиқаришни ташкил қилишни назарда тутсин.

12. Ўзбекистон Республикаси Уй-жой коммунал хизмат кўрсатиш вазирлиги, «Ўзтрансгаз» АК, «Ўзбекэнерго» АЖ, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари белгиланган тартибда, мансублиги бўйича қурилаётган маҳаллий қозонхоналарга зарур муҳандислик ва коммуникация тармоқлари тортилишини, шунингдек, табиий газ, электр энергияси ва совуқ сув узлуксиз бериб турилишини таъминласинлар.

13. Ўзбекистон Республикаси Уй-жой коммунал хизмат кўрсатиш вазирлиги Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари, Фавқулодда вазиятлар вазирлиги, «Саноат-геоконтехназорат» ДИ, «Ўздавнефтгазинспекция» ДИ, «Ўздавэнергоназорат» ДИ билан биргаликда маҳаллий қозонхоналар, хонадонларга яқка тартибда ички иссиқлик таъминоти тизимлари ўрнатилиши ва фойдаланишга қабул қилиниши устидан доимий назоратни таъминласинлар.

14. Республикамизда ишлаб чиқарилмайдиган, Дастурни амалга ошириш доирасида Ўзбекистон Республикаси Вазирлар Маҳкамаси томонидан тасдиқланадиган рўйхатлар бўйича олиб келинадиган ускуналар, бутловчи буюмлар ва материаллар 2023 йилнинг 1 январига қадар божхона тўловлари тўлашда (божхонада расмийлаштириш учун йиғимлардан ташқари) озод қилинсин.

15. Ўзбекистон Республикаси Уй-жой коммунал хизмат кўрсатиш вазирлиги Адлия вазирлиги ҳамда бошқа манфаатдор вазирлик ва идоралар билан биргаликда икки ой муддатда қонун ҳужжатларига ушбу қарордан

316-317-моддалар

— 36 —

18 (778)-сон

келиб чиқадиган ўзгартиш ва қўшимчалар тўғрисида Ўзбекистон Республикаси Вазирлар Маҳкамасига таклифлар киритсин.

16. Мазкур қарорнинг ижросини назорат қилиш Ўзбекистон Республикаси Бош вазирининг биринчи ўринбосари — «Ўзбекистон темир йўллари» акциядорлик жамияти бошқаруви раиси А.Ж. Раматов зиммасига юклансин.

**Ўзбекистон Республикаси
Президенти**

Ш. МИРЗИЁЕВ

Тошкент ш.,
2017 йил 20 апрель,
ПҚ-2912-сон